

La anr surdat il timun strategic a la FMR

Il rinforzament da la medias rumantschas progredescha tenor plan

DA MARTIN CABALZAR

■ **La Fundaziun Medias Rumantschas (FMR) daventa successura da l'Agentura da novitads rumantscha e surpiglia da quella la funcziun d'alimentar las medias rumantschas cun contribuiziuns schurnalisticas en tut ils tschintg idioms rumantschs ed en rumantsch grischun.** En sia ultima sesida ch'ha gi lieu ier a Cuir ha il cussegl da fundaziun da la anr approvà las midadas dal document da fundaziun ed il reglament correspondent ed uschia surdà il timun strategic a la FMR. Las collavuraturas ed ils collavuratur actuals da la anr vegnan integrads automaticamain en la fundaziun transfurmada.

Il nov cussegl da fundaziun

Il cussegl da fundaziun da la anr en sia cumposiziun actuala ha era gi d'eleger formalmain en sia ultima sesida il nov cussegl da fundaziun da la FMR che vegn timunà da l'anteriura chanceliera federala *Corina Casanova*. Ella è creschida si a Tarasp e Ruschein. Ella ha fatg matura a la Scola chantunala grischuna e studegià giurisprudenza a Friburg. Tranter 1986 e 1990 è ella stada delegada dal comité internaziunal da la Crusch cotschna en divers pajais. Suenter engaschaments en il servetsch dal parlament a Berna ed en il secretariat dal Departament federal dals affars exteriurs è ella daventada 2005 vicechanceliera e 2007 chanceliera federala. Demissiun 2016. Actualmain è ella presidenta dal Forum Helveticum e dad ombudscom.

Il cussegl da fundaziun vegn completà da personalitads reconuscidas ch'enconuschan fitg bain la situaziun da la minoritad rumantscha en tut sias facetts e sias sensibilidades: *Barbara Janom Steiner*, anteriura directura da finanzas dal chantun Grischun e presidenta actuala dal cussegl da banca da la Banca Naziunala Svizra, *Aurelio Casanova*, anteriur

deputà dal cussegl grond dal chantun Grischun e president communal da Glion, *Carl Hassler*, anteriur manader da l'Institut d'assicuranza sociala dal chantun Grischun, e *Rico F. Valär*, professor da litteratura e cultura rumantscha a l'Universitad da Turtig. Betg pli represchentads en il cussegl da fundaziun èn ils clients sco ils editurs da las gasettas existentas La Quotidiana, «Posta Ladina» e «Pagina da Surmeir», da Radio e Televisiun Rumantscha ed ils represchentants da la Lia Rumantscha e da la Pro Svizra Rumantscha. Il cussegl da fundaziun che cumpeggia tschintg fin nov commembers vegn accompagna d'in cussegl consultativ che resguarda ils basegns pragmaticals dals clients e tegn en egl la lavur schurnalistica.

Il cussegl da fundaziun elegia tranter auter il schefredactor/la schefredactura da la FMR e sin sia proposta er il cader da la FMR. La responsabladad publicistica giascha tar il schefredactor che sutmetta er al cussegl da fundaziun il concept redaziunal ed ils carnets da duairs dals collavuratur al cussegl da fundaziun per approvaziun. Il process da recrutaziun dal nov schefredactor vegn terminà proximamain. La structura redaziunala duai vegnir realisada sin l'entschatta da l'onn 2020.

In model cun caracter da pionier

Cun resalva da l'examinaziun furmala da la surveglianza da fundaziuns po la FMR cumenzar ussa sia lavur. Sia incumbensa primara è si da metter a disposiziun redaziunalmain texts schurnalistics, fotografias e graficas da buna qualitad en tut ils tschintg idioms e rumantsch grischun per las medias rumantschas. Questa purschida vegn complettada cun cuntegns en rumantsch grischun che vegnan contribuìs dad RTR e ch'han plitost caracter da novitads. La redaziun da la FMR suttamessa a la fundaziun vegn manada



Il cussegl da fundaziun da la anr suenter sia ultima sesida: **Guido Jörg (manader anr), Gian Sonder (URS), Martin Candinas (PSR), Gian Michael (Renania), Walter Gammeter (Posta Ladina), Martin Gabriel (LR), Cecilia Manetsch (contabilitad), Silvio Lebrument (Somedia), Reto Filli (Radio Südostschweiz), Martin Cabalzar (La Quotidiana) ed Erwin Ardüser (da san.).**

MAD

d'ina schefredactura u d'in schefredactor.

Rinforzament da la cuntrada da la medias rumantschas

Tenor la communicaziun da pressa è il project «Medias Rumantschas 19» vegn accelerà ils ultims 18 mais principalmain da la Lia Rumantscha. La finamira d'ina cooperaziun tranter purschiders privats e publics en il sector redaziunal è en questa furma numnadamain in novum. Il rinforzament da la cuntrada da medias rumantscha progredescha tenor plan: Mez fanadur vegn la Fundaziun Medias Rumantschas (FMR) sco fundaziun independenta cun sedia a Cuir a cumenzar la lavur. Suttamessa ad ella è ina re-

dacziun che vegn a producir cuntegns per las medias rumantschas en cooperaziun cun RTR e chasas edituras privatas, ina cooperaziun ch'ha caracter da pionier en Svizra.

Chasas edituras coopereschans senza perder lur independenza

Gia il mars 2019 han tut las chasas edituras privatas cun medias rumantschas sco era RTR exprimì en ina charta comunabla la voluntad da collavurar pli stretgamain quai che pertutga ils cuntegns senza stuaier renunziar a lur independenza. I vala il princip che tut ils partenaris participads che fixeschan cun la FMR ina cunvegna da prestaziun vicendavla pon utilizar questa purschida da

cuntegns gratuitamain e senza discriminaziun per lur agens products ed en il rom da determinaziuns da concessiun (RTR). Da lur vart s'obligheschan ils partenaris da prestar lavurs editorialas sco p. ex. stampar, distribuir e commercialisar ina gasetta. Tut ils partenaris vegnan tractads sistematicamain tuttina, independentamain da lur differents basegns e lur furmas da produziun divergentas.

Tuttina sco fin ussa l'anr basegna era la FMR sustegn finanziar da la confederaziun e dal chantun. Entant che l'Uffizi federal da cultura ha gia segirà ses sustegn vegn il cussegl grond dal chantun Grischun a tractar la fatschenta l'atun en il rom da la debatta davart il preventiv.